

《中國地方藝文薈萃》編委會 編

學苑出版社

中國地方藝文薈萃

華東卷·徐州輯萃

華東卷·第四輯

柒

中國地方藝文薈萃

《中國地方藝文薈萃》編委會 編

德州师范学院内部使用

松風餘韻五十卷末一卷（五）

貴州师范学院内部使用

松風餘韻五十卷末一卷（五）

（清）姚弘緒編

據清乾隆八年（一七四三）刻本影印

松風餘韻卷第四十五

目錄

明

顧英一首

顧定芳一首

顧從禮一首

顧從義四首 聯句詩一首

顧斗英七十二首

顧昉之一十七首

計翊一首

松風餘韻卷四十五

胥浦姚弘緒聽巖編次

顧英

〔雲間志略〕英字孟育號草堂上海人自少竒逸有大志不屑屑治家人事間從博遊已乃行賈壯歲始讀書一舉而登天順己卯鄉薦初授雲南廣西府同知以憂歸補任陝西之延安九載陞知廣南府其在延安也會兵荒民多逋負公移文所司曰本郡北連沙漠東遶河隍西接慶環南通關陝欲以一年之收完數年之負竊恐民不堪命逃竄愈多乞以舊糧量收輕齎候充俸支折色庶幾夙逋

既有完期新徵亦無墮誤牒上軍民兩沾其惠歸
德等堡東西兩路土曠民饑撫臺丁公委以安撫
公往閱田計丁給以牛具三年然後起科民以為
便中官汪直進軍征討道經其地猝欲用馬槽數
千時已薄暮公命掘地作坎築以起土爇火燎之
以供芻秣人稱其有濟變之才其在廣南值車里
讐殺宣慰板雅氏者死二子長庶幼嫡爭立未定
撫按檄公冒險行千餘里辨嫡庶之分定其事是
役也日不再食夜宿樹間衝薄瘴癘出入虎狼豺
豕之羣自是有家園之念明年即致仕歸於縣治
五里外構南溪草堂賦詩弈棋以自適宦囊甚薄

而志在行德於鄉倣范文正公故事出田十餘頃
為義莊以贍宗族白其事於府未及行而卒公奉
身而退尚在強盛之年享林泉之樂歌咏太平者
二十稔卒祠青浦縣鄉賢祠方志草堂遺橐廣南
守顧英著陸文裕公曰余幼嘗記口誦所作如雖
憂地險難為客且喜宮闕好讀書竹林斜日聽啼
鳥苔徑東風數落花吸殘金露難消渴種得荷錢
不濟貧等篇今集亡之蓋多散失所存者止此而
此亦足以傳矣

梅屋

曹定菴居在
玉屏山麓

寒月輝輝影半簾報春消息在山南黃丸子結當牕小

白竇花開隔座酣東閣閒情吟倚檻孤山清興在巡簷
主人鐵石心腸在冷淡相看老不厭

顧定芳

〔雲間人物志〕定芳字世安號東川遊邑庠入太學
深於醫素問內經皆熟誦精了故相夏文愍走書
延至京師會世廟重醫學建聖濟殿以祀醫之先
聖先師掌醫院工書許紳遂以公薦召拜御醫領
諸醫直其中尋奉命授內侍醫經預校睿皇所集
方監製御藥時時賜金綺進修職郎致仕公為人
孝友侍父母疾醫禱必虔至以口續食以體藉卧
宗黨仰公衣食婚葬置學田百畝役田若干頃方

文愍死西市賓客莫敢過門公獨周旋其間又為
治殮令其子從禮扶櫬登舟尤人所難歸而徜徉
西湖山水間思以終身會島夷入寇避居吳興卒
年六十有六以子從禮官光祿寺少卿贈奉政大
夫崇祀鄉賢上海縣志定芳廣南知府英之孫也
以薦召為御醫世宗問用藥之道對曰用藥如用
人又問攝生以清心寡欲對上嘉之馮元成集同
鄉徐文貞公在翰林為議廟制不合謫延平理尋
為貳定芳力薦之夏公遷浙江提學僉事旋進江
西提學副使值夏公誕日迫文貞使未至定芳託
山人能詩者代文貞作五言排律百韻以賀外又

具金酒鎗蟒幣皆甚腆厚文貞不知也會選宮坊
夏即以文貞薦旋拜洗馬自此遂至顯位相嵩初
以定芳黨夏頗側目至是定芳賓客說嵩曰顧氏
父子不悖德不邀利真義士也收之門下可得其
死力於是定芳父子並又為嚴徐重客徐感定芳
恩以女歸其孫父子往來二相間天下士趨之輻
輳焉

南極現禎祥曲壽分宜相七十

堯舜垂衣治萬方臯夔補袞輔虞唐禎祥忽現中興日
玉清仙侶降華堂君明東駕白鹿至婉衿西馭青鸞使
三星雍容玉几前羣仙雜沓瑤階侍鸞輿鶴駕來繽紛

玉笙寶瑟聲樂殷瓊漿化作花間露瑞氣蒸為島外雲
芝蘭玉樹森森植崑崙高積蟠桃核元功壽域正無疆
聖世乾旋開紫極

顧從禮

方志從禮字汝由御醫定芳子值世廟狩承天夏
公言以從禮薦奉詔題十三廟謚號穆宗登極又
題世宗神主御容廟號先後被殊賞自中書兼翰
林院典籍歷官光祿寺少卿加四品服色致仕性
至孝友兄弟六人同居共爨喪祭務遵古禮上海
困倭始議築城從禮發粟四千餘石築小南門以
為倡募民有能穿城壕工版築者計功給粟城壘

六十餘丈壕亦稱是又捐地建青浦邑治及儒學
樹碑表表將軍墓置田以助里役辛酉大饑出租
三千斛煮粥以飼卒年八十四配祀夏公忠禮書
院馮元成集從禮初以使歸里太守史直臣折節
禮之稱為翁書刺稱通家生從禮罄折循墻不敢
當已臧繼芳代史為守從禮往謁臧曰兩房中書
所謂宰相奴也惡得自誇送迎不踰階從禮怡然
曰人翁我翁相客耳非真敬我人奴我奴貲郎耳
亦豈真慢我要之我自適我意豈假他人榮辱哉
人服其言南吳舊話錄夏文愍論辟客鳥獸散無
敢名夏公客者時顧光祿獨雪涕為經紀其喪或

謂曰分宜恐不能以古人相期光祿歎曰吾受夏
公知遇又何忍以今人自處乎分宜固所畏然人
在天地間苟義無所逃正不因勢位搖落

與董子元過本一禪院

滄江落日映流霞野寺維舟興轉賒古木千年生雨露
新題滿壁走龍蛇迴廊宛轉禪機寂寶殿高低海月斜
立度同遊真勝事况逢支遁說南華

顧從義

郭志從義字汝和上海人御醫定芳之子光祿寺
少卿從禮弟也善書能詩嘉靖庚戌詔選端行善
書名在第五授中書舍人隆慶初以豫修國史成

擢大理寺評事家構玉泓館手摹宋本淳化帖多
藏法書名畫金石鼎彝又善繪事工署書為文徵
明王世貞父子所重有硯山山人詩彙行世南吳
舊話錄顧硯山少後其叔署正上川公既而上川
舉子從周署正素多藏比歿而周安人操籥嚴甚
坐視硯山為支持門戶向人緩急開府曹公雅習
硯山行部至縣密謂令劉曰顧署正得階文林郎
以硯山為後所贈也今舍人貧甚為人後而僅提
空名蕭條苦塊殊可念也令趨出告硯山將收其
紀綱問狀硯山避席對曰先君子固無餘貲况某
以倫序得為後不在橐中有無願明公謹秘之苟